

## TE AAI O PAHEROO

E parau teie, tei tupu na i te tau, hou oia te mau aivanaa o te moana uri pao, e tae mai ai i to tatou mau taa motu. Hou atoā oia, te mau tamarii unauna a te atua, i fanoai ai, i o tatou nei.

Te vai noa ra ia, te mana o te mau arii i roto i te mau motu.

I nia i te motu no HAVAIKI (o RAIATEA i teie mahana), te parahira te hoe aito o Paheroo te ioa, i TETOORO, TEVAITOA. Taata rahi tupu raa huru e. Ua tui tona roo no tona ra puai.

Tae i te hoe mahana, ua pii te arii no MATAIREA, o Atea TERIITEPOAREI, i tona hoa te arii no HAVAIKI, ia tonono mai i te hoe aito. Aita oia i tiaturi i te mau aito i pihaiho iana. E feia haavarevare roa.

Teie atoā mau aito, aita atoā ratou i mauruuru ia Atea, ei arii no ratou, no te mea, e ere oia no roto mai i teie mau tamarii e vau no MATAIREA. E hotu painu oia.

I te pō, ua fano atura Paheroo i te fenua MATAIREA na nia i tona vaa tauati.

I ropu ia HAVAIKI e o MATAIREA, ua hoa te uira. Na te matai puai e te ua i turai tona vaa. Mai te titiraina ra ia tona vaa te tere. Aita oia i mau faahou i te paireti tona faurao. Ua reva roa te vaa i nia te aau. Mutu atura te aau e te motu.

Area o Paheroo, i te pae tatahi no te outu no URAMOAE te mau raa mai.

I te poipoi raa, ua haere atura Paheroo e hiohio, faarooroo i te mau parauparau a te mau taata. Te rave ra ratou i te maa no te faatahinuraa i te arii. E i nia noatu, te vaira te marae o MATAIREA-NUI te ioa. (Ua riro o MAEVA, o ATUPII i tera ra tau, e nohoraa no te mau arii atoā no MATAIREA i te pae miti o FAAUNA-NUI.)

Ua pauma atura i nia, e turui atura i nia i te hoe ofai, no te faarooraa i ta ratou mau ohimu.

I te taime tamaaraa, ua tufa hia ihora ta te mau arii maa e te mau teuteu i raro ae i tana faatereraa. Area, ta Paheroo ra, ua faaere hia oia.

I te pae miti ra, e piti ia na vahine, te horoi ra i ta raua mau pupu, e te eru ra i te tu'ai i te outu ra o PAORIE. Te ohimu atoa ra raua ia Paheroo ma te faoo e te ata.

« -Taata rahi haama ore. Ua tano roa, aita tana, e maa i horoa hia. Haere noa mai e parahi. O vai hoi ona.

- Ei, a iroiro ai te taata ra, e upoo rahi, e mata fera, e te taria vaavaa... HI! HI! HI!..... »

Te faaroo noa ra o Paheroo i taua mau parau taatoa ra no te mea te puhauhau maira te matai rii i taua taime ra, a parau ai na vahine nei.

« E maoa e rii ohimuhimu no te tua i PAORIE taua matai nei ia. »

No te rahi o te haama, e te riri o Paheroo i te ohimu noa raa hia ona, ua parau atura :

« E a, eiaha na te hoe mero vahine e parau mai tou huru. »

Haere atu ai oia i raro, na nia atura i te ea, e taparahi atura i te taata i farerei iana i nia te ea i TEFAAITI oia o TAMAPUA.

Haere atura oia na PATI. Tia atura i VAITIRIOTA, e ite atura i te hoe apoo pape teatea maitai. Haamata ihora i te pio no te inu. (Ua hinaaro oia i te faahaumaru i tona tino)

Hio ihora oia i tona ata. Hiti mahuta atura oia te ite raa i tona ra hohoa nao aera oia iana iho.

« E ere iho a vau i te hioraa taata. E upoo iti rahi e te faufau. Ua tano hoa na vahine i te parau raa. »

Pii atura i taua vahi ra o VAIHIOHIOTA.

Haere faahou atura oia i uta atu, i te pae miti ra, e fariuriu noa ai no te mea te faaroo noa ra ona i te tavevo na roto i te mau peho. Tuu atura i tana omore : RUUNA-ITE-ARA-POU- OHU-TARAVA, te ioa, i roto i te miti. Topa ihora i te ioa no taua vahi ra o TARAVA.

Haere atura na nia i tana omore e tae atura i te tahi pae. Ia na ra i pou, tia atura oia i nia i te tahi ofai, tei parauhia e ana, ofai NEVANEVA.

Faaroo aera i te hoe reo i te pii raa mai iana. Te reo ia o te arii no FAAIE.

« Haere maira, e tau hoa, haere maira. E tauturu hoi au ia oe. »

Tuturi aera oia, ma te tahopu atu.

« E ore oe e moe iau. No to oe ra maitai rahi. »